

# IROQUETICA ITIONCAQUECA PEERERO

## *Antsatantaquemparoca*

Ocatica iroguenti antsatantaquemparoca iroquetica itioncaqueca Peerero itioncajiaquerigueti joriojia tsarоventajiacarica Jesoshi oaguetananquitsica quepatsipaequi icantajitica Ponto, Garashia, Caparoshia, Ashia, aisa Vitinia (1.1). Peerero irio jorio, irio itigarancane Jesoshi. Irocashi itioncacotaqueri irira Peerero otsipaqui paperiqui (Ya. 1.12-5.42; 8.14-25; 9.32-12.19; 15.7-11). Iquenquejajitaque itioncaquero ocatica paperi irooca ajagantsiniqui 63, irooca 64. Chooca quenquejajianquitsica itioncaquero ichoocaquegueti guinteninintsiqui pajitatsica Vavironia (5.13). Cotanquitsiquea iconoagarantajiaca pariacaroca quemisantajiaquerica Quirishito iquenquetsatacoquerogueti Iroma, teequea tampatica incanteroji ovajiro, mana yomanaquero, iquempetacaacaro Vavironia iponeajiacagueti catsimajiaquerica ivaesatiniteni paesatoniqui. (Pamenero Yonig. 14.8; 17.5; 18.2.) Chooca quenquejanquitsica arica ichoocaque Peerero Iromaqui itioncaquerogueti ocatica paperi.

Itioncajiaqueneri inquenquejacaajiaqueriniji joriojia quemisantajiaquerica Jesoshi intampishitashijiaquero yatsipeventajiacarigueti Amajirote yoguijajiavaquerogueti cameetsaguetatsica irantaguetaqueca Aapani Irioshi

yamenajiaquerigueti        iquemisantajiaqueri  
 Jesoshi (1.2-12), yatsipeventajiacajitari iriatimpa  
 (2.18-25). Itsatacaaajiaqueri icantashitatiajiacari  
 Ishire Aapani Irioshi (4.1-11). Icantajiaqueri  
 irantsipejiaquempa acaniqui quepatsiqui  
 quemisantajiaquerica Jesoshi (3.18-22; 4.12-  
 19). Icantajiaqueri quero incojiaquempani  
 inchoocajiaqueniji cameetsa igomajamajarejia  
 Aapani Irioshi (1.13-2.3), aisa quero incoji-  
 aquempani irantajiaquenerigueti inintaguetica  
 Aapani Irioshi (2.11-17). Itsatacaaajiaqueri quero  
 incojiaquempani shirampari aisa imanquigare  
 inchoocajiaquegueti cameetsa (3.1-7), aisa  
 quero incojiaquempani quempoguijajiguirica  
 quemisantajiatsica (5.1-11). Icantajiaqueri irira  
 Jesoshi iquempetacaro mapi anijatsica, irirajia  
 quemisantajiatsica iquejejiacaro otsipapae  
 mapicota anijatsica ipeacaantacaca Aapani  
 Irioshi tsovironaqui inchoocashirentaqueca (2.4-  
 10).

<sup>1</sup> Narouenti Peerero tioncajiaquempiroca oca,  
 narouenti itigarancane Jesoquirishito. Imaica  
 nonintaque nontioncajiaquempi paperi maasano  
 aviatimpajia icoguiajiaqueca Aapani Irioshi poro-  
 cajiananquitsica gunteninintsipaequi, oajianan-  
 quitsica Pontoqui, Garashiaqui, Caparoshiaqui,  
 Ashiaqui jero aisa Vitiniaqui.

<sup>2</sup> Igantagaqueate coramani icoguiajiaquempi  
 Aapani Irioshi, itsatsijiaquempitarite  
 tequeratagueti pinchoocateji. Ariqueate yo-  
 gameetsashirentajajimpi Ishire cameetsanijite  
 pisavicaventajiaje inintaguetica iriatimpa.

Icoguiajiaquempitari pinquemisantajiaqueriniji Jeso quirishito, intsiquirijashirentantajiajempironiji iriraja. Namanacoventajiaquempi incavintsa jimentajiaquempiniji Aapani Irioshi inchoocatacaajiaquempinijite cameetsa aatonijite pishoshoguite ventajigaro taaca opajitapae.

*Peerero itsaroventacari Aapani Irioshi*

**3** Iintsija ashineventajiaquempari Irioshte Amajirote Jeso quirishito, iriotaque aisa Iriri, ancantajiaqueriquea: “Poganejen-camajata.” Icavintsa jamajaci acajiqueate irijanintantajiacajica quejetaca queate iroaquer asano avojaijai queate cameetsanijite anijimentajiajenijite coajica. Ivo chantajiritarite Jeso quirishito, irootaque queate atsatantajiacaca anijajiajesacanica aatimpajia aisa oajianaje-sacanica ontaniqui jenoqui inquitequi.

**4** Imeshiajiajitarite Aapani Irioshi cameetsanijite oimentajiana quenijite ontaniqui jenoqui inquitequi ivetsicajiacajigueti anchoocatantajia pojempaca. Aato queate opejaa, aato ocantaiteti, aisa ocancaniquea oganejencaguitemajataquempa. Iquempogui-jajiaquempiro quea ontaniqui inquitequi.

**5** Paventajiacariquea Aapani Irioshi irootaque quea iquempogui jantajiaquempica iragavejanequi, ari quea inquejetana quempa arejeva etantapo jempaca parejeji apo jempa gueti ontaniqui inquitequi pamena jia pojero maasano ironiga antajia queca oncoraman itapo jegueti.

**6** Irootaquequeate pishinemajatantajiacaca. Arica imaica pantsipejiaquempa taaca opajitapae, cotanquitsi aato osamanititsi avisanaque maasano patsipejiavetaca.

**7** Oraqueate patsipejiacagueti mana iramenajitaquero arimajaca piquemisantamajataque, aricampa tee. Quejevaetaca cavorejatatsica icantajitica ooro itajaitirigueti cameetsanijite intaimentajiqueronijite conoacarica, iriguentiqueate igotanajatsine cavorejatanquitsica. Ivecaramajavetacaqueate ooro cotanquitsiqueate oncoramanitapojegueti interoncanajempa. Aviatimpajia caaviji panajaiaqueri ooro, irootaquequeate imaica pantsipemajataquempagueti maasano arimpagueti pinquemisantamajatanaqueri irishineventamajataquempiqueate Jeso quirishito oncoramanitapojajegueti incoraquetajegueti incantajiaquempiqueate: "Cameetsavaequequempiqueate, imaicaqueate iintsija naajianaquempi jenoqui inquitequi picancaniqueate pinconoajiaquena naatimpa, noshineventajiaquempitarite."

**8** Teequeate pinejajiajvetempariji, cotanquitsi pipintsajiacari. Tee pinejajiajvetempariji imaica, cotanquitsiquea paventajianacari, irootaquequeate pishinemajatantajiacaca. Caaviji pishinemajajiaca, oganejencavaeca ocatica shinevaetagantsi,

**9** imeshiajiaquempitari pishirequi aatoniji pipejaijaa, irootaquetari paventimentantajiacarica.

**10** Coramani irirajia tsavetantajiacatsica yapatsa-

javantamajajiaquero Itioncacaantaqueca Aapani Irioshi, aisa iquenquejamajajiaquero intsajiaque quero incojiaquempini Aapani Irioshi incavintsa-jajiaquempigueti irimeshiajiaquempigueti, aisa irajaijaempigueti coajica, ariqueate iquenquetsatacopiaquero aisa.

<sup>11</sup> Iriraqueate Ishire Quirishito choocashirenta-jiaquerica iquenquetsashirentacaajiaqueritarite itsatacayaqueri irantsipeventajiacaji Quirishito coajica, ariqueate irimetojaventajianacaji, coajica iramenajero iroganejencare. Arikeate iriatimpajia iquenquejamajajiaquero intintamajajiaqueterarite intsajiaqueme querocaqueate apanquempaca inquejetaquempa imaica, aisa quero oncoguetanaquempani.

<sup>12</sup> Cotanquitsi ariqueate itsatacayaqueri Aapani Irioshi aatoqueate yamenajiguiro iriatimpajia onetsanamajataquempagueti maasano itsavetantajiaqueca, iriguentijiatarite amenajiaquerone impoiguetanquitsineca. Irootarite imaica itsavetantajiaqueca quenquet-satacaaajiaquempica icamantajiaquempigueti quero icota Aapani Irioshi imeshiantigueti, iriotaquequeate agavejacaajiaquerica Ishire Aapani Irioshi poneanquitsica jenoqui inquitequi. Iriraquea irashivantijitete Aapani Irioshi intintajavetaca intsamajajiaqueromequeate maasano ocatica itsavetantajiaqueca.

*Aapani Irioshi intintaque incomajamajajiaque-mpa maasano quemisantajiguirica*

<sup>13</sup> Irootaquequeate nocantantajiaquempica imaica pinquenquejamajajiaqueroja quero pin-

cojiaquempani pincomajamajajiaquempagueti  
aisa pinquenquejamajajiguero quero incojiaque-  
mpi Aapani Irioshi incavintsajajiaquempigueti  
coajica incoraquetajegueti Jesoquirishito.

<sup>14</sup> Pinquemisantamajajiaqueri Aapani Irioshi,  
aviguentijiatarite irijanijiate. Aatoquea piqueje-  
jija coramani tequeratagueta pintsajigueriji pan-  
taquerogueti pinintashiguetacaca intati.

<sup>15</sup> Iroguentiquea pinquempejiaquempariquea  
Iriomajatatsica cajemajajiaquempica teequea  
incovaeguishetimatempaji, pinquejetantajiaque-  
mpaca aviatimpajia pincomajamajajiaquempaja  
querocaca pantajiaqueca.

<sup>16</sup> Aritarite ocantaque Itioncacaantaqueca:  
“Pincomajamajajiaquempaja aviatimpajia,  
irooriji nocomajamajataca naatimpa.”

<sup>17</sup> Piquenquetsatacaaajiguirigueti Aapani  
Irioshi picantajiguiri: “Aapani.” Iroosacanicate  
imaica picancanija pimpincatsamajajiaqueri  
irosati pimetojajianaje, teenicate inchoocatenica  
apaniro iranaaque impintsamajataquempaca.  
Irosatiquea mana ipintsamajajiacari maasano  
intati, yamenajiaqueritarite ariqueate  
iquejetavacaajiaca maasano. Irootaquequeate  
icantomajantajiacarica maasano antaguishejigu-  
iroca teeca oncameetsateji.

<sup>18</sup> Coramani mana poguijatacojiavetacaro-  
queate itsatacaaajiaquempica pivaesatinite, cotan-  
quitsi manaqueate poguijatacotamampeajiacaro  
intati, teequeate omeshiajiguempiji. Cotanquitsi  
coajica yaajiajimpiqueate Aapani Irioshi  
aatonijite piquempejija imaica. Tee irioqueate  
irovegaratantajiguempiji imentaquipae

teroncanajatsineca yaajiajimpigueti,

<sup>19</sup> iroguentiqueate yovellaratantajaqueempi iriraja Quirishito quejetacarica ovejajanqui teeca incovaeguishetempaji, teeca inchacotimateji.\*

<sup>20</sup> Coramani tequeratagueti impeacaguemparo Aapani Irioshi quepatsi igantagaqueate icantsitaca quero incoquempani Quirishito, cotanquisquea imaica pajinigueti aapojempa savinacguiteripae vegaratapojaatsineca yonigaantaqueriquea incavintsajajiaquempiniji.

<sup>21</sup> Pitsajiaquerigueti Quirishito paventajiacariequa Aapani Irioshi tancorejajirica imetojavetacagueti, aisa yoganejencatacaajari, irootaquequea paventantajiacarica Aapani Irioshi, poguijajiaavaqueri incavintsajajiaquempi.

<sup>22</sup> Piquemisantamajajiaquerogueti Quenquetsatsarentsimajaca ishejiajimpiro piguempevaere, imaicaquea jac netsanamajajianaquempi cameetsanijite arimaja pimpintsatimentajaquemparinijite papiguemisantarijijateni. Imaica picancaniquea pimpintsatavacaamajajiaquempaja aatoqueate picatsimatavacaimajijaatsi.

<sup>23</sup> Quejejiaquempiqueate iroaquerasanoca pivoajiaji. Teequeate iriguenti oacaantajiguempine caquinte metojajijaatsineca, iriguenticuate irijanintajiguimpi Aapani Irioshi, piquemisantajiaquerotarite Iguenquetsatsare.

---

\* <sup>1:19</sup> Coramani yamejiacaqueate joriojia icarajiguiniriqueate Aapani Irioshi oveja, cotanquitsi iriguenti icarajiaqueneri oveja cameetsamajatanquitsica quericaca **teeca inchacotimateji**. Ariqueate iquejetaca Quirishito iriatimpa icameetsamajataque teequeate inquempevaetimatempaji, irootaquequeate yagavejantacaca imetojaventajiacaji.

Oraqueate Iguenquetsatsare anijaque,  
oncoguitempani onchoocaguiteni, aato opega.

<sup>24</sup> Aritarite ocanti tioncanquitsica:

“Maasano caquinteja manaqueate iquejejiacaro  
cataroshi ometojitagueti, ariqueate  
iquejejiaca iriatimpajia teequeate  
inquishojigueji.

Ariqueate oquejetaca aisa yanaantajiguigueti  
manaquea oquejetacaro ovempenaquipae  
teequeate onquishopempenaquiteji,  
ariqueate inquejejiaquempa iriatimpajia  
aatoqueate igantaga yanaantajigui.

<sup>25</sup> Cotanquitsi oraqueate Iguenquetsatsare Ama-  
jirote oncoguitempani onchoocaguiteni.”

Irootaquequeate quenquetsatsarentsi  
itsavetantajitaqueca icamantajitaquempirogueti  
Quenquetsatsarentsi Oganejencatatsica.

## 2

<sup>1</sup> Irootaquequeate nocantantajiaquempica  
povashiantajianajero maasano pantagueve-  
tacaca teeca oncameetsateji. Aatoqueate  
pamatavijantajiaji, aisa aato picantashijiaja  
intati. Aato picatsimatacotsitiri itsipa  
querocagueti icocani jero aisa taaca opajita  
yashintacaca, aisa aato pinijashitantajiaja.

<sup>2</sup> Aviatimpajia pinintamajajiaqueroja Iguen-  
quetsatsare Aapani Irioshi, pinquejejiaquempar-  
ija chaajaniquitirajaca iriaqueraca voanquitsi  
yametarogueti itsomi imponcantanaquempaca.  
Ariqueate pinquejejiaquempa pinquenqueja-  
majajiaqueroja Quenquetsatsarentsimajaca  
ontampishitacaajiaquempiniji pishirequi

arimpanijite pinquemisantamajajianaqueri  
Aapani Irioshi irosati irajaianaquempi jenoqui  
inquitequi.

<sup>3</sup> Pitsajiaquetarite yoganejencamajataca Ama-  
jirote, icavintsajajiaquempitarite.

<sup>4</sup> Pinquempejijiapojaquempari iriatimpa  
quempetacaroca mapi anijatsica. Irirajia  
caquinte imanintajavetacaro ocatica mapi  
yantajiguirogueti mapipanco, cotanquitsi  
Aapani Irioshi icoguiaquiero, ishinevencaro  
yamenauerotarite oganejencamajata.

<sup>5</sup> Aisa aviatimpajia mana piquejejiacaro otsipa-  
pae mapicota anijatsica ipeacaantacaca Aapani  
Irioshi tsovironaqui inchoocashirentaqueca.  
Aisa piquejejiacari isaserorotejiate, quejetaca  
pitaajiaqueneri viratsi ishineventacaca  
pisavicaventamajaquerogueti maasano  
intinguistica, piquemisantajiaqueritari  
Jesoquirishito.

<sup>6</sup> Aritarite ocanti itioncajitic coramani:

Icanti Aapani Irioshi: “Nonquejetaquempari  
coguiaqueroca mapi yantaquerogueti  
mapipanco, icoguiaquiero cameet-  
samajatanquitsica ompeaqueunpanijite  
anaantamajatanquitsineca. Aritarite  
nocoguiaqueri Quirishito nontigaranc-  
aqueri Shionequi, namenaqueritarite  
caaviji yoganejencata.

Maasanoqueate quemisantajiaquerineca  
aatoquea ipashivent.”

<sup>7</sup> Aviatimpajia quemisantajiatsica pamena-  
jiaqueri yoganejencamajata. Irira teeca

8 Aisa onetsanataca itioncacojiquerogueti ocanti:  
“Iriatimpa mana iquejetacaro mapi itivatantajita-  
taca ariqueate irromposantajitaquemparo.”  
Teenicate irinintajigueji inquemisantajiaquer  
Iguenquetsatsare Aapani Irioshi, irootaquequea  
tee intsatantajiaquemparica Quirishito, mana  
icomijiavacari, irootaquetarite icantaque Aapani  
Irioshi coramani.

9 Cotanquitsi aviatimpajia icoguiajiaquempi Aapani Irioshi igonorontajajimpi, inintacaja-iaquempi pimpeajiaquempsa isaserorotejiate Majirontamajatatsica. Aisa inintacajajiaquempi pincomajamajajiaquempsaqueate maasano, yashintamajajiaquempitarite. Mana oquejetaca imaica cameetsanijite pincamantimentajiaquerinijite maasano quero icota Aapani Irioshi, caaviji yoganejencamajata. Coramani teequeate pintsajiavetempaji quejevaevetacaqueate manaca pipitsecacojiaque intati, pantaguisheji-avetacarotarite teeca oncameetsateji, cotanquitsi ariqueate imeshiajajimpi quejevaetaca manaca pisavincaguitetacojianaji, teenicatarite pantajajeroji pantaguishejiavetacaca coramani.

<sup>10</sup> Coramani tee irashintajavetempiji Aapani Irioshi, cotanquitsi imaica aviguentijiaqueate ir-

ijanijiante. Aisa teequeate queri incavintsajajiavetempiji, cotanquitsi imaica icavintsajajiaquempiqueate Aapani Irioshi.

<sup>11</sup> Napiguemisantarijijateni nopintsamajajacaca, aato osamani pichoocajigui acaniqui quepatsiqui. Ariguenti poajianaque pinchoocamajajiapojaquequea ontaniqui jenoqui inquitequi ichoocaquegueti Quirishito. Nocantantajiaquempicaqueate pintampishitashijiaqueroyate maasano teeca oncameetsateji ishineventajiacaca caquinte, quejetacaquea ashimirintacaro pishire arisanoja oquempevaeshirentacaajianajimpitsi.

<sup>12</sup> Imaica pinconoajiaquemparigueti teeca inquemisantajigueji cameetsaqueate pinchoocajigue. Ariguetija irinijashijiavetaquempi ijiqueji irooqua pantajiaque teeca oncameetsateji, cotanquitsi coajica iramenajiaquempi arimaja picomajamajajiaca irishineventajiavaquempariqueate Aapani Irioshi incoraquetajegueti, incantajiaqueri: “Arimajasacanicate yantajiaque cameetsatatsica.”

### *Peerero icantajiaqueri inquemisantajiaquerija majirontajiaatsica*

<sup>13</sup> Aviatimpajia piquemisantajiaquerigueti Amajirote, imaica pinquemisantajigueri aisa maasano pimajirojiate choocatanquitsica acaniqui quepatsiqui.

<sup>14</sup> Pinquemisantajigueri pimajirote anaantatsica aisa quejemajirovecarica itigarancaqueca incantajiaqueriqueate antaguishejiguiroca teeca

oncameetsateji incantomajajiaqueri, jero aisa irishineventajiaquempari netsanajianquitsica.

<sup>15</sup> Irootarite ininqueca Aapani Irioshi pinetsanamajajiaquempaja cameetsanijite poguemisantimentajiaquerinijite nijashijiaquempica teeca intsajigueriji Aapani Irioshi.

<sup>16</sup> Tecatsi omperajiaquempine imaica, nocantantajiaquempica pantajiaquero cameetsaguetatsica. Aatoquea picantitsi: "Imaica nantaguishetaque taaca opajitapae nonintaguetica naatimpa, tecatsitarite omperataquenane." Aato ocameetsati pinquejetaquempagueti. Pinquemisantajiaquerija Aapani Irioshi ashintamajajiaquempica.

<sup>17</sup> Cameetsaja pinquenquetsatacaaajigueri maasano caquinte, paajiavaqueri maasano. Pimpintsajiaquemparija papiguemisan-tarijiatevi. Pimpincatsajiaqueriqueate Aapani Irioshi, pintsaroventajiaquempari. Pimpincatsajiaqueri aisa pimajirojiate, cameetsaja pinquenquetsatacaaajiaqueri.

### *Quero incojiaquempani aajanirentsija*

<sup>18</sup> Aviatimpajia yomperajiacaca, pinquemisantamajajigueri omperajiguimpica aato pipigatsajigari. Aato apaniro piquemisantajiguiri cavintsajajiaquempica, pinquemisantajiaqueriqueate aisa semajiguimpica.

<sup>19</sup> Incatsimatashijitaquempigueti intati pantsiperejacojiaquemparoqueate. Pinquejiaquempagueti imaica pintsajiaque iriguenti piquemisantajiaque Aapani Irioshi, ariqueate imaica irishineventaquempi.

<sup>20</sup> Oraqueate managueti pantsipejiaquempa incatsimatimentajitaquempirogueti pantaquerogueti teeca oncameetsateji, ¿arimpate irooqueate irishineventimenquempi Aapani Irioshi? Aatoqueate. Cotanquitsi oraqueate iroogueti pantsipejiaquempa pimajeretanaque incatsimatashijitaquempirogueti intati pantaquerogueti cameetsatatsica, ariqueate imaica irishineventimentajitaquempi.

<sup>21</sup> Irootaquequeate inintaque Aapani Irioshi pinquejejiaquempa imaica. Pinquenquejamajajaqueri Quirishito yatsipeventajiacajigueti, ariqueate intsatacayaquempi quero pincojiaquempani pantsipejiaquempagueti incatsimatashijitaquempirogueti intati.

<sup>22</sup> Iriatimpa tee inquempevaetempaji, aisa teequeate iramatavijantimateji.

<sup>23</sup> Oraqueate inijashijitacarigueti teequeate impigatantempaji. Aisa yatsipetacaajitacarigueti teequeate incatsimajigueriji atsipetacaajiacarica, mana icantaque: “Inchiquiojita incantaque Aapani Irioshi quero incojiaquempani.”

<sup>24</sup> Oraqueate imetojaventajiacajigueti Quirishito corosiqui manaqueate yaitajianacajiro aguempevaerejia itsinoqui yatsipeventajiacaji aatonijite icatsimatimentajiro Aapani Irioshi. Imetojaventantajiacajica aatonijite aquempevaejiajatsi, manaqueate ancomajamajajianajempa intati. Yompa-jacojitaqueri corosiqui cameetsanijite irimeshiimentajajinijite ancoguitempaniniji anijajiajeniji.

<sup>25</sup> Coramani manaqueate piquejejiavecari in-

tati oveja timpinanquitsica, cotanquitsi imaica pipianaja ichoocaquegueti Quempoguijantatsica Agamajacoshirentaquempica.

### 3

*Quero incojiaquempani shirampari aisa iman-quigare inchoocajiaquegueti cameetsa*

<sup>1-2</sup> Aviatimpajia manquigarentsijia pinquemisantamajajiaquerija manquigatimpica. Irioguetiqueate teeca inquemisantero Iguenquetsatsare Aapani Irioshi cotanquitsi iramaenquempigueti pinquejetaquero imaica arica irinintanaque inquemisantanaque iriatimpa aisa. Aatoqueate icoacota pinquenquetsatacaajeri pincantajiaqueriqueate inquemisantajiaque, yamenaquempitarite picomajamajajiaca, piquemisantajiaqueri.

<sup>3</sup> Aato iroguenti piquenquejajiguitsi pinetsanamajajiaquempagueti pinetsanajiaquero pitsinoquitica quejetacaroca pimae jero pinenquequiaquempa taaca opajitapae vegaramajatanquitsica jero aisa pinquitsaajiaquempa quitsarentsi cameetsamagotanquitsica.

<sup>4</sup> Iroguenti pinetsanajiaque pishire pinquenquejajiaque quero pincojiaquempani pinchoocatimentajiaqueniji cameetsa aatonijite osemashirentacaguimpi taaca opajita. Aritarite anetsanajiaquerogueti ashire ancoguitepani anchoocajiaque cameetsa. Irootaquequeate inintamajatica Aapani Irioshi.

<sup>5</sup> Aritarite oquejejiaca manquigarentsijia coramanitica quemisantamajajiguirica

Aapani Irioshi, ochoocajiaque cameetsa, aisa oquemisantamajajiguir manquigataroca.

<sup>6</sup> Ariqueate oquejetaca coramani Sarani iroatimpa, oquemisantamajatiri Averaameni, aisa opincatsamajatiri amenaquerigueti iriguenti ashintaro. Imaica aviatimpajia pinchoocajiaquegueti cameetsa, aisa aatogueti pitsaroajigui, ariqueate pinquejejiaquemparo iroatimpa.

<sup>7</sup> Aviatimpajia shiramparijia cameetsaqueate poajiaquero pimanquigarejia, teesaconatarite ontampishimajajigueji onquejejiguempi aviatimpajia, aisa mavititarite icavintsajajiaquempi Aapani Irioshi imeshiajiaquempigueti cameetsanijite irosatiniji pinchoocajiaque iriatimpaqui. Pinquejejiaquempa imaica cameetsaqueate poajiaquero pimanquigarejia cameetsanijite inquemimentajiaquempinijite Aapani Irioshi pamanajiguerigueti.

### *Quero ancojiaquerini atsipetacaajiacajica*

<sup>8</sup> Imaicaquea imaica mana noncantajiaquempi pinquemavacaajiaquempaja, aisa pincavintsjavacaajiaquempaja. Pimpintsajiaquemparija papiguemisantariteni, pincavintsajantajiaquequeate, aatoqueate pinintajigui panaantajiaque.

<sup>9</sup> Querocagueti incojiaquempini itsipa aatoja pipigajigari. Incatsimajiaquempigueti incatssajiaquempigueti, aatoja pipigajigari. Iroguentiquea pamanajiaqueri Aapani Irioshi incavintsajaqueri. Irootaquetari inintacaantajiaquempica Aapani Irioshi incavintsajimentajiaquempinijite.

<sup>10</sup> Ocanquetarite itioncacojiqueca ocanti:

“Quericaca nintanquitsineca irishinevaequempa  
 aisa iriguinentitaquempa cameetsa,  
 aatoqueate inijaguishevaeti, aisa aatoquea ya-  
 mataga.

**11** Aato yantaguishetajiro teeca oncameetsateji,  
 mana irantaque cameetsaguetatsica,  
 irinintamajataquequeate inchoocajiaque  
 cameetsa.

**12** Icavintsajajiguiritarite Amajirote maasano  
 quemisantajiguirica,  
 aisa icancani iquemajiguiriri quenquetsatacaaajigu-  
 irica,  
 cotanquitsi iriraqueate antaguishetiroca  
 teeca oncameetsateji teequeate  
 irishineventajiguempariji.”

**13** Pinintamajajiaquegueti pantajiaquero  
 cameetsaguetatsica, ariqueate querocampate  
 incatsimatimenquempica.

**14** Cotanquitsi inchoocajiaquegueti  
 catsimatimentajiaquempironeca pantaquegueti  
 cameetsaguetatsica, picancaniquea pishineji-  
 aquempa. Aatoqueate pitsaroacagari, aatoja  
 pishoshoguiteta.

**15** Manaqueate pintsaroventamajajiaquempari  
 Quirishito, pamenajiaqueriqueate tee  
 inquempevaetempaji, pincantajiaqueri:  
 “Aviguenti Nomajirote.” Incoacojiaqueempigueti  
 quero ocotaca piquemisantantacarica Aapani  
 Irioshi, pishinejiaquempaqueate pincantajia-  
 queriqueate. Pincamantamajajiaqueri quero  
 picotacani pitsatantajiacaca poajianaque jenoqui  
 inquitequi ichoocajiaquegueti Aapani Irioshi  
 picancaniquea pinchoocajiaopojaque.

**16** Cotanquitsi cameetsaqueate pinquen-  
quetsatacaaajaqueri, aatoja picatsimajiguiru.  
Pinetsanamajajiaquempaja cameetsanijite  
impashiventimentajianaquempanijite quericaca  
catsimatimentajiaquemperineca Quirishito  
arigueti irivosantejimentajitaquemperi  
iramenajiaquempigueti piquemisanqueri.

**17** Iriogueti nintanquitsine Aapani Irioshi  
pantsipejiaquempa incatsimatimentajiquem-  
pirogueli cameetsaripae, cameetsavaetaque,  
caavijitarite anaaque ocameetsamajataque  
onquejetaquempagueti imaica, anaquiero  
pantsipejiaquempagueti incatsimatimen-  
tajiquempirogueli pantajiguirogueli teeca  
oncameetsateji.

### *Yatsipetacagueti Quirishito*

**18** Aritarite yatsipetaca Quirishito aisa.  
Imetojaventajiaca jigueti irishejiaqueronijite  
aguempevaerejia, apatiroqueate imetojaven-  
tajiacaji yagaqueroquea maasano. Iriatimpa  
yoganejencamajataca queate teequeate inquem-  
pevaetempajji, cotanquitsi imetojaventajiaca  
aatimpajia quempevaejiatsica cameetsanijite  
iraajianacaji anconoajiaquempariniji Aapani  
Irioshi. Imetojajivetacari itsinoqui, cotanquitsi  
yanijacaajiri Ishire.

**19** Yoashirentanaquequea iquenquetsatacaa-  
jiaquitiriqueate ishirejia ashitacoshirejianquitsica.

**20** Irriojiatarite teeca inquemisantajigueji  
coramani ichoocaquegueti Noeni. Oraqueate  
tequeratagueji interonqueroji inirojegui  
quenajarontsi icantajitica aareca, irira Aapani

Irioshi osamaniqueate yoguijajiavecari teetaqueate irantsipetacaajiguempariji. Oraqueate iteroncaquerogueti quenajarontsi, ariqueate itejaquero inirojenca incani anancacojianaqueri maasano, ariqueate iteroncajiaca yojocajajiaca. Iriguentinivani yaajiavaji 8 amajatacojianquitsica aarecaqui.

<sup>21</sup> Irooquea ogomarotaque imaica piviñacajajiacagueti iraajiavajempiniji Aapani Irioshi. Tee irooquea piviñacajatashijiguempaji pinquivero cantaitero pitsinoqui, manaqueate piviñacajatantajiacaca pincantajiaqueriniji Aapani Irioshi pinintaque irishejiajempí pishirequi aatoniji ochoocataji incantomajimentaquempica manaquea pinquenquejajianaqueri cameetsaguetatsica. Ipochatanajitarite Jeso quirishito yagavejantacaca iraajiavajempí.

<sup>22</sup> Cotanquitsi ipochatanaji ariqueate yoanaji jenoqui inquitequi. Imaica chooca isavicaque itincamijempequi qui Aapani Irioshi imajirontamajatagueti, yanaajiaqueri maasano: irashivantijitete Aapani Irioshi, majirontaguevetatsica, agavejantaguevetatsica, maasano.

## 4

<sup>1</sup> Nocamantantajiaquempicaqueate imaica cameetsataque pantsipejiaquempagueti aviatimpajia pinquejejiaquempari Jeso quirishito yatsipeventajiacajigueti itsinoqui. Antsipeventajiaquemparigueti iriatimpa atsinoqui, aato aquenquejajajiro teeca oncameetsateji.

<sup>2</sup> Imaica choocatirajajigueti atsinoqui acaniqui quepatsiqui, aatoqueate coanatsi antaguishe-

jiguero taaca opajitapae teeca oncameetsateji, iroguenti anquenquejamajajiaque antajiaque inintaguetica Aapani Irioshi.

<sup>3</sup> Coramani pantaguishejiaqueterite taaca opajitapae teeca oncameetsateji ishineventaca teeca inquemisanteriji Aapani Irioshi. Poashijiaquero manquigarentsi aisa piquenquejaguishejiaquero teeca oncameetsateji. Pishinquiijiaca, aisa picapiocajiacameetsanijite pishinquiijaquempa pantaguishejiaqueniji teeca oncameetsateji. Icantavecaqueate Aapani Irioshi: “Aatoja pitsaroventari itsipa”, cotanquitsi teequeate pinquemisantajigueriji, arimpaquea pijatiri pitsaroventajianacari piroshivijitashitacaca.

<sup>4</sup> Imaica teenicate pinconoajiajempariji antaguishejiguiroca teeca oncameetsateji, irootaquequeate icantantajianacaca: “Querocate icojianacani imaica teequeate inconoajiajajiji”, ariqueate inijashijijianaquempi.

<sup>5</sup> Cotanquitsi chooca ontaniqui inquitequi irira Cantimentantatsica, incoacojiavaqueriqueate irira nijashijiaquempica, incantajigueri: “¿Quero ocotaca pinijashitajiajivetacarica irira quemisantajiaquenaca?” Aritarite incantimentajiaqueriqueate maasano taaca opajitapae yantajiaqueca maasano quempevaejiatsica imaica, iriocampa metojajianquitsica jerijia tequerataca irimetojajigueji.

<sup>6</sup> Irootaquequeate iquenquetsatacaantajitarica irirajiaqueate metojajianquitsica coramani. Imetojajajavetaca, iriguentijitarite quempevaejiatsica quejearica maasano igonoro-

jia, cotanquitsi iquenquetsatacaa jitaqueri itsavetacojitaquero Quenquetsatsarentsi Ogane-jencatatsica cameetsanijite incoguitempalinijite inchoocajiaque ishirejia inquempejajempari Aapani Irioshi.

*Icantajiaqueriqueate incavintsajajiaquerija  
irapiguemisantariteni*

**7** Imaica pajiniqueate aguempa onteroncantapojempaca maasano acaniqui quepatsiqui. No-cantantajiaquempica pinquenquejamajajiaqueja quero pincojiaquempa, pincomajajiguempaja. Irosati pinquenquetsatacaa jitaqueri Aapani Irioshi.

**8** Pinintamajajigueja pimpintsatavacaamajaji-aquempa. Pinquejejiaquempagueti imaica aato-quea piquenquejajiguiro quero incojiaquempini papiguemisantarijijateni, manaqueate pimpeacotajemparo.

**9** Paavacaajiavaquempa, poguimaajiavaqueri osamanipa equitica, aato picantimanatiri.

**10** Aapani Irioshi icantashitatijajaque-mpiqueate yagavejacaajiaquempi apaniropae. Irootaquequeate nocantantajiaquempica imaica querocaca yagavejacaajiaquempica irootaque-queate pisavicaventajiaque cameetsanijite pamitacojiaquerinijite papiguemisantariteni, cotanquitsi pisavicaventamajajiaquerojate cameetsanijite iramenimentajitaqueronijite arimaja icavintsajantamajati Aapani Irioshi.

**11** Choocaguetti tsavetantsica irooqueate intsavetantaque icanqueca Aapani Irioshi.

Choocagueti amitacojiguirica irapiguemisantarteni irooqueate iramitacomajajaqueri, itampishitacaqueritari Aapani Irioshi. Pinquejejaquempa imaica cameetsanijite intsaroventimentajitaquemparinijite Aapani Irioshi, iriguentitarite agavejacaquempine Jeso quirishito. Iintsija acancanija antsaroven-tajiaquempari, iriguentitarite caavijica yagavejamajati. Ari oncoquempa.

*Icantajiaqueriqueate irishinejiaquempaja yatsipeventajiacarigueti Quirishito*

<sup>12</sup> Nopintsamajajiacaca, aato poajianaque intati patsipejiacagueti, aato picantajigi: “¿Quero ca ocatacani ocatica?” Aritarite onquejetaquempani imaica cameetsanijite iramenajiaquempini-jite Aapani Irioshi arimajaca piquemisantama-jataqueri.

<sup>13</sup> Coramani yatsipevaetaca Quirishito. Imaica pishinejiguempa, piquejejiacaritarite iriatimpa patsipejiacagueti cameetsanijite pishinetimentajitaquempanijite oncoramanitapojaquetai iramenajitaqueriqueate irimajirontamajatapojaquempa.

<sup>14</sup> Pishinejiaquempaqueate irivosante-jajitaquempigueti iramenajiaquempigueti piquemisanqueri Quirishito. Ichocashirenta-jiaquempitarite Ishire Aapani Irioshi, iriguentiquea Oganejencari.

<sup>15</sup> Inchiquiojitaja patsipeventajigarotsija pime-tojantajiaquegueti, jero aisa pincoshijiaquegueti, aisa pantagushejiaquerogueti otsipapae teeca

oncameetsateji. Aisa inchiquiojia patsipeventaji-garotsija piticaavaquerigueti taaca opaji irante.

<sup>16</sup> Iroogueti pantsipeventajiaquempa pinquemisantajiaquerigueti Quirishito, aatoja pipashiventajiga, manaqueate pintsaroventaji-aquempari Aapani Irioshi pamenajiaquegueti iriguenti patsipeventajiac Quirishito.

<sup>17</sup> Aapojacatarite impariantanaquemparoca Aapani Irioshi iramenantajiaquemparica maasano, cotanquitsi iriqueti parianacaro at-sipejianquitsi irijanintajiacaca cameetsanijite iramenajitaquero arimaja iquemisantamajajiaque aricampa tee. Aritarite aquejejianaca aatimpajia imaica atsipejiacagueti, iriompate irirajia teeca inquemisantajigueroji Quenquetsatsarentsi Oganejencatatsica itigarancaqueca Aapani Irioshi ¿quero incojiaquempani iriatimpajia? Arimaja irantsipemajajiaquempa.

<sup>18</sup> Irantsipejiavetaquempaqueate quemisanta-jiatsica, cotanquitsi Aapani Irioshi irajaiavajeri. Irirampani covaeguishetatsica teeca inquemisan-teriji Aapani Irioshi, ¿quero incojiaquempani iri-atimpajia?

<sup>19</sup> Irootaquequeate noncantantajiaquempica iriogueti nintanquitsi Aapani Irioshi pantsipeventajiaquemparo inintaguetica iriatimpa, arimpaqueate pantajianaqueroja cameetsaguetatsica. Iriotaquetarite peacaajiacaji, irooqueate cameetsataquequeate pinquenquetsatacaajiaqueri pincantajiaque-riqueate: “Nonintaque pamenacomajataquena, notsataquetarite pinetsanatero maasano picantaqueca.” Aatotarite yamatavijiguimpi

Aapani Irioshi.

## 5

### *Peerero icamantajiaquerigueti quempoguijajiguirica quemisantajiatsica*

<sup>1</sup> Imaica nonintaque nontsatacaa jiaquempi aviatimpajia quempoguijajiguirica quemisantajiatsica capiocapinijiatsica ontaniqui, naroguentitari aisa quempoguijajiguirica quemisantajiatsica. Naroguentitarite amenamajataquerica Quirishito yatsipetacagueti. Oncoramanitapoja jegueti incoraqueta jategueti ironigaampo jempa yoganejencavaeca, ariqueate intsipatanajena naatimpa aisa, nonquejetana quempari.

<sup>2</sup> Imaica irootaque queate noncantantajia quem-pica ocatica: Pinquempoguijamajajiaquerija pa-piguemisantarijiate ni, inintacajia queempitarite Aapani Irioshi pinquempoguijajiaqueri. Pintsat-aa jiaqueriqueate, aatoja piperajiga. Inchiquio-jita pinintajiana que aviatimpajia pintsatacaaji-aqueri, aatoqueate icantajiguimpi itsipa, aisa aatoja iro pitsatacaashitanti paaqueniji imen-taquipae, manaquea pinintamajajigue pamitaco-jiaqueri.

<sup>3</sup> Aatoja picatsimatsajiguiri pinquempoguijajiaquerigueti, manaqueate cameetsaqueate pinchoocajiaque cameetsanijite iroguijataco-jiana quempinijite iriatimpajia.

<sup>4</sup> Pinquejejiaquempagueti imaica, oncoram-itapoja jegueti incoraqueta jegueti Jeso quirishito

quempoguijajiajica maasano aatimpajia, irajianajempi intsipajianaquempiqueate jenoqui inquitequi, incavintsajamajajiaquempiqueate pincoguitempani pinchoocamajajiaquequeate cameetsa pinquejejiaquempariqueate iriatimpa.

<sup>5</sup> Imaica aviatimpajia quemisantajiatsica pinquemisantamajajiaquerija quempoguijajigimpica, aisa maasano pinquemisantavacaajiaquempaja, aato pinintajigui panaantajiaque. Aritarite itioncacojiquerogueti ocanti:  
“Aapani Irioshi ipigajiacari irirajia aventacojatsica,  
cotanquitsi icavintsajamajajiaqueriqueate irirajia teeca iraventacojiguempaji.”

<sup>6</sup> Irootaquequeate nocantantajiaquempica pimpincatsamajajiaquerijate Aapani Irioshi agavejamajatatsica. Oncoramanitapojaquegueti aapojempagueti irinintanaquegueti incovejencatacaa-jiaquempi, incovejencatacaa-jiaquempiqueate.

<sup>7</sup> Taaca opajitapae piquenquejajiguica aatoja pishoshoguiteventajigaro, manaqueate pincantajiaqueriqueate Aapani Irioshi incavintsajamajajiaquempiqueate, igantagatarite iquenquejajiaquempi tee impeacojiguempiji.

<sup>8</sup> Pinquenquejamajajiaque cameetsa, pagama-jaquemparija imajirote ampatsini catsimaji- aquempica. Iquejetacariea chaonari ican- tigueti morororo, iquenaguetanaque yamenague- tanaque irishecaquempaca.

<sup>9</sup> Cotanquitsiqueate pintampishitashiji- querija aatoqueate piquemisantajiguiri. Picancaniqueate pinquemisantamajajianaqueri Amajirote, aatoja povashiantajiguiro

piquemisantajiaquerigueti, pitsajiaqueta  
ariecate iquejejiaca papiguemisantarijiate  
gunteninijiatsica osamanipaequitica  
yatsipejiacaroqueate taaca opajitape.

<sup>10</sup> Ariqueate pinquejejiaquempagueti imaica  
pantsipejiaquempagueti, iriraquea Aapani  
Irioshi iramitacojiaquempiqueate aatonijite  
povashiantajigiro piquemisantajiaquegueti,  
aisa intampishitacajajaqueemp iero aisa  
inquemisantacaamajajiaquempiqueate.

Ariqueate osamanijencaquegueti pinquejeji-  
aquempa imaica, ariqueate intsipajianaquempi  
jenoqui inquitequi pincoquempaniquea  
pinchoocajiaapoje ontaniqui, pinquejejiaque-  
mpariqueate iriatimpa icovejencatigueti,  
irootaquetari inintacaajajaqueemp Aapani  
Irioshi, aisa icavintsajamajajiaquempiqueate  
piquemisantajiaqueritarite Jesoquirishito.

<sup>11</sup> Iintsija acancaniquea antsaroventajiaque-  
mpari, iriguentitarite caavijica yagavejamajati,  
incoguitempani irimajirontamajaguitempani.  
Ari oncoquempa.

<sup>12</sup> Chooca acaniqui notsipatamacari Shirivano.  
Iriatimpa iriguenti papiguemisantariteni  
quemisantamajatirica Quirishito. Iriotaque-  
queate notsipatashitacaca notioncajiaquem-  
pigueti capichaji notsavetanquerigueti Aapani  
Irioshi quero icota icavintsajajiaquempigueti,  
aisa notampishitacajajiaquempiqueate  
cameetsanijite arimpanijite pinquemisan-  
tamajajianaqueri. Aato povashiantajajiro  
piquemisantajiaqueca.

<sup>13</sup> Irirajiaqueate apiguemisantarijiate

guintenijiatsica Vavironiaqui\* inintajiaque pinquemacojiaqueri iquenquejajiajimpi. Iriraqueate Aapani Irioshi inintacajaiaqueri iriatimpajia inquemisantajiajeri inquejejiaquempiqueate aviatimpajia. Ariqueate iquejetaca aisa notsatacaane Maricoshi nopeaqueca nirijanite, iriatimpa inintaque pinquemacojiaqueri iquenquejajiajimpi.

<sup>14</sup> Netsana pinintavorotavacaavaquempa,<sup>†</sup> pimpintsatavacajiaquempa. Namanacoventajiaquempi piguintenijiaqueempanijite cameetsa maasano aviatimpajia quemisantajiguirica Quirishito. Ari oncoquempa.

---

\* **5:13 Vavironia.** Iconoagarantajiaca pariacaroca quemisan-tajiaquerica Quirishito iquenquetsatacoquerogueti Iroma, tee-quea tampatica incanteroji ovajiro, mana yomanaquero, iquem-petacaacaro Vavironia iponeajiacagueti catsimajiaquerica ivaesatiniteni paesatoniqui. (Pamenero Yonig. 14.8; 17.5; 18.2.) Arica ichoocaque Peerero Iromaqui itioncaquerogueti ocatica paperi.  
 † **5:14 Netsana pinintavorotavacaavaquempa.** Yamejiaca coramani inintavorotavacaajiajavaca yamenavacaajiacagueti, ari iquejejiaca tsaroventajigarica Quirishito coramani.

**Iroaquerari Itioncacaantaqueca Aapani  
Irioshi: Tsavetacoquerica Amajirote  
Jesoquirishito**

**New Testament in Caquinte (PE:cot:Caquinte)**

copyright © 2008 Wycliffe Bible Translators, Inc.

Language: (Caquinte)

Translation by: Wycliffe Bible Translators, Inc.

Caquinte[ cot], Peru

**Copyright Information**

© 2008, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

**The New Testament**

in Caquinte

**© 2008, Wycliffe Bible Translators, Inc. All rights reserved.**

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

**xxviii**

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2022-12-21

---

PDF generated using Haiola and XeLaTeX on 18 Apr 2025 from source files  
dated 29 Jan 2022

a31aed44-e5b1-5420-8e3c-ccef224c4988